

ŠEF MISIJE OEBS-a U BiH U POSJETI SIPA

Bezbjednosne agencije pod političkim pritiscima

N. HASIĆ

ISTOČNO SARAJEVO - Državna agencija za istrage i zaštitu (SIPA), kao i ostale sigurnosne agencije u BiH izložene su političkim pritiscima, posebno u predizbornoj kampanji, kazao je juče Džonatan Mur, šef Misije OSCE-a u BiH.

Tokom nastupne posjete SIPA istakao je i da politički pritisci, najizraženiji uoči izbora, nisu specifičnost BiH, jer se dešavaju i u drugim državama.

"Važno je da agencije na svim nivoima rade u skladu sa zakonom i o tome smo razgovarali. Nadam se da će okvir za rad sigurnosnih agencija u BiH nakon izbora biti mnogo bolji", izjavio je Mur.

Rekao je i da opasnost od krađe glasova na izborima ne postoji samo u BiH, nego i u ostalim zemljama. Mur je uvjeren je da će, zahvaljujući i međunarodnim posmatračima, opšti izbori 12. oktobra proteći regularno i da

ZAKON
Važno da agencije na svim nivoima rade u skladu sa zakonom

Goran Zubac
Džonatan Mur



će rezultati potpuno odražavati volju birača.

Goran Zubac, direktor SIPA, rekao je da je Mura informisao o prioritetima u radu Agencije.

"SIPA je svakim danom sve ozbiljnija agencija. Mi ćemo u budućnosti sve manje pričati, a o nama će sve više govoriti naši rezultati", obećao je.

Ni on ni Mur nisu željeli govoriti o krivičnoj prijavi koju je SIPA 5. septembra podnijela protiv zamjenika ministra sigurnosti BiH Mladena Čavara i tužioca Tužilaštva BiH Miroslava D. Markovića. Glasnogovornik Tužilaštva BiH Boris Grubešić rekao je juče da neće voditi istragu povodom prijave protiv Čavara i Markovića.

"Tužiteljstvo BiH donijelo je naredbu o neprovođenju istrage jer je iz prijave i pratećih spisa očigledno da prijavljeno djelo nije krivično djelo", obrazložio je Grubešić.

Nakon razgovora s predsjednikom FBiH Živkom Budimirom, Mur je istakao nadu se da će uslovi na predstojećim izborima biti najbolji mogući.